

清容外集

函一
五十册

清容外集

墨畫

曉

川

曉

詞

尊

明

雪

紅雪樓藏板

臨川夢自序



客謂予曰。湯臨川詞人也。歟。予曰。何以知之。曰。讀四夢之曲。故知之。予听然而笑曰。然則子固歌者也。何足知臨川。客愠曰。非詞人。豈學人乎。予曰。明史及玉茗堂全集。非僻書。子曾見之歟。曰。未也。予曰。然則子固歌者也。又烏知學人。乃取明史列傳。及玉茗堂集。約畧示之。客慙而退。嗚呼。臨川。一生大節。不避權貴。遁爲執政所抑。一官潦倒。里居二十年。白首事親。哀毀而卒。是忠孝完人也。觀其星變。一疏使爲臺諫。則朱雲陽城矣。徐聞之講學明道。遂昌之滅。

虎縱囚爲經師爲循吏又文翁韓延壽劉平趙瑤鍾離意呂元膺唐臨之流也詞人云乎哉然則何以作此四夢也曷觀臨川之言乎題牡丹亭曰夢中之情何必非真題紫釵曰人生榮困生死何常爲歡苦不足奈何題邯鄲曰岸谷滄桑亦豈常醒之物耶槩云如夢醒復何存題南柯曰人處六道中嘵笑不可失也夢了爲覺情了爲佛境有廣狹力有強劣而已嗚呼其視古今四海一枕竅蟻穴耳在夢言夢他何計焉予恐天下如客者多矣乃雜採各書及玉茗集中所載種種情事譜爲臨川夢一劇摹繪先生人

品現身場上庶幾痴人不以先生爲詞人也歟嗟乎先生
以生爲夢以死爲醒予則以生爲死以醒爲夢於是引先
生旣醒之身復入于旣死之夢且令四夢中人與先生周
旋於夢外之身不亦荒唐可樂乎獨惜婁江女子爲公而
死其識力過於當時執政遠矣特兼寫之以爲醉夢者愧
焉然而予但爲夢中人說夢而已固無與於醒者客果以
臨川爲詞人又何不可之有哉甲午上巳鉛山蔣士銓書

于芳潤堂



王茗先生傳

湯顯祖字義仍一字若士江西臨川人生嘉靖二十九年庚戌有文在手年二十一舉於鄉忤陳繼儒遂以媒蘖下第萬曆五年再赴會試張居正欲其子及第羅致海內名士以張之延顯祖及沈林學顯祖謝弗往林學乃與居正子嗣修偕及第顯祖歸六年迨居正歿之明年癸未始成進士與時宰張四維申時行之子爲同年二相招致之又不往除南京太常博士久之稍遷祠部朝右慕其才將徵爲吏部郎上書辭免十九年閏三月以彗星變詔責諫官

欺蔽大開言路顯祖抗疏論劾政府信私人陰扼臺諫語
仇直數千言謫徐聞典史至任日立貴生書院講學士習
頓移陞遂昌知縣減虎放囚誠信及物翕然稱循吏二十
六年戊戌投劾歸不復出辛丑外計追論議黜之李維禎
爲監司力爭曰此君高尙久矣不應考法主計者曰正欲
成其高耳竟削籍里居二十餘年父母喪時顯祖已六十七
齡明年以哀毀卒遺命以麻衣草屨歟顯祖志意激昂
風節遒勁平生以天下爲己任因執政所抑遂窮老而歿
天下惜之所善同邑帥機及李三才梅國禎李化龍後皆

通顯各有建豎三才督漕淮上招之答曰身與公等比肩
事主老而爲客所不能也論文以本朝宋濂爲宗李夢陽
王世貞氣焰雖盛皆斥之爲僞體當霧雰充塞之時能排
擊厯下者只顯祖與歸有光二人而已所居玉茗堂文史
狼籍雞塉豕圈雜沓庭戶蕭閒詠歌俯仰自得胸中魁壘
發爲詞曲所著四夢雖留連風懷感激物態要於洗蕩情
塵銷歸烏有作達觀空亦可悲矣子四人土遽五齡能背
誦三都二京年二十三死次大耆才致有父風次開遠崇
禎五年由鄉舉爲河南推官奏論時事屢膺上怒責令指

實開遠抗論不少屈。上命削職逮治。左良玉率將士七十
餘人。士民數百人合奏乞留。上爲動容。命帶罪辦賊。十年
討平舞陽大盜。以功擢安廬三郡監軍史。可法薦其治行
卓異。晉秩副使。十三年與黃得功大破諸賊。將用爲河南
巡撫。竟以勞瘁卒。哭聲震郊野。贈太僕少卿。弟季雲亦有
雋才云。



論輔臣科臣疏

萬曆十九年

湯顯祖

奏爲星變陳言輔臣欺蔽如故科臣賄媚方新伏乞聖明
特加戒諭罷斥以新時政以承天戒事臣於閏三月二十
五日接得邸報見吏部接出聖諭六科十三道邇來風尙
賄囑事向趨附內之效外外之借內甚無公直好生欺蔽
且前者天垂星示羣奸不道汝等職司言責何無一喙之
忠以免辱曠之罪汝等於常時每每歸過於上市恩取譽
輒屢借風聞之語訕上要直鬻貨欺君嗜利不軌汝等何
獨無言好生可惡且汝等豈不聞官府中事皆一體之語

乎何每每以搜揚君惡沽名速遷爲汝等之職受何之爵食何之祿至於長奸釀亂而旁觀避禍無斥奸去逆之忠職任何在本都該拿問重治姑且從輕各罰俸一年吏部知道欽此大哉王言正君臣之義誅邪佞之心嚴矣粲矣南都諸臣捧讀之餘不知所以有云此必言官以星變責難皇上致有此諭臣竊意皇上前大理評事雒于仁等狂愚直言猶賜矜恕又前伏讀兩次聖諭一則引咎在躬一則因星警逐去左右蠱惑擅作威福之人則言官卽有過言必見溫納何至合科道盡行切責罰俸是惟聖明居高

洞遠灼見六科十三道中必有賄囑趨附長奸釀亂倍負上恩之處夫臣之責難皇上旣不難於聽宥而聖諭嚴切臣子亦宜各以常憲官師相規臣今日敢竊附斯義也夫臣子本心自有衷赤權利蒙之其心始黑非必六科十三道盡然特一二都給事等有勢利小人相與顛倒煽弄其間耳記曰人父生而君食之其恩一也故子之兄弟相引而欺其父皆爲不孝臣之大小相引而欺其君皆爲不忠然豈今之科道諸臣都不知此義哉皇上威福之柄潛爲輔臣申時行所移故言官向背之情爲時行所得耳夫人

臣自非天性公直要取富貴而已富貴者明王所以誘天下公直權奸所以誘天下私邪皆此具也使公直者不失富貴誰當私邪私邪者不得富貴誰非公直今日不然也臣不敢汎舉非言官而言事者皆以失輔臣意得罪卽以臣所知言官論之首發科場欺蔽者非御史丁此呂乎此知上恩效一喙之忠者也時行知將論其子也教吏部尙書楊巍覆而去之惟恐其再入都矣終言邊鎮欺蔽者非御史萬國欽乎此亦知皇上恩效一喙之忠者也時行不能辨其贓也諷大學士許國擬而竊之猶恨其不極邊矣

二臣謫外其他言官雖未敢顯斥時行而或涉其旁事及其私人則有年例及不時補外二法以牽聳衆言官使其迴心斂氣而時行得以滔然無臺諫之虞矣惟近日南京御史李用中奏正其子冒籍之法而時行故以一請塞責旋行祈請欲得皇上一語不礙其子進取無乃要君甚乎至於考滿與奏奇捷同日正用前輔臣張居正故智其奏捷疏中有牛馬羊不計其數南中諸臣皆笑曰此經畧公賀儀也明日獎敕中必用此事已而獎敕果有元輔課功之日正西陲奏凱之晨數語矣然臣按其日月則元輔宴

功之晨正星象示警之夕也時行能欺蔽皇上獨能欺蔽天象乎而言官噤無言之者正以丁此呂萬國欽爲戒恐失富貴也夫知感主恩爲皇上斥奸正法者反得貶竄雖皇上恩力不能庇之故今科道中無義之臣遂謂皇上不能恩人并不知所受是皇上爵祿矣至於言官中賄囑附勢盛作不忠之事蹣竊富貴者往往而是年陞閨陞以爲例固然矣故此輩不知上恩專感輔臣其所得爵祿若輔臣與之者雖他日有敗今日固已富貴矣臣亦不暇遠舉卽如今日吏禮二科都給事此二臣者豈不重爲天下僇

笑哉夫吏科都給事中楊文舉者非奉詔經理荒政者乎。文舉所過輒受大小官吏公私之金無筭。夫所過督撫司道郡縣取之足矣。所未經過郡縣亦風厲而取之。郡縣官取之足矣。所住驛遞及所用給散錢糧庶官亦戲笑而取之。聞有吳吏檢其歸裝中金花綵幣瑣盤等物約可八千餘金折乾等禮約可六千餘金古玩器直可二千餘金。而又騎從千人賞犒無節所過雞犬一空迨至杭州酣酒無度朝夕西湖上其樂忘歸初不記憶經理荒政是何職名也。夫前所賄賂宴費數萬餘金者豈諸臣取諸其家蓄而

與之哉。正是刻掠飢民之膏餘，攢那賑帑之派數，以相支持，過送買其無唇舌耳。已而廣賣薦舉，多寡相稱，每薦可五十金，不知約得幾千金。至於暮夜爲人鬻獄，如減凌元應軍之類，又不知幾千金。夫三輔臣皆家蘇徽二郡，文舉之貪，凡蘇徽二郡人士，皆能言之。輔臣獨不知耶？未幾復命，而吏部紀錄居然首諫垣矣。乃知文舉之貪有所用之也。輔臣亦非不知之也。而從長安來者曰：此闕政府原有別待。文舉再四從中曲處得之耳。夫皇上德意，親發內帑，金錢賑救生靈之死，而文舉乃敢貪贓宴樂，擾害飢民，買